

La Pagina

da Surmeir

emda
25



Bel reir: igls giuieders dall'amprema equipa digl CB Surses gioian tuttegn da nov ainten la 3. liga. Cò sen ena fotografia digl settember 2020.

MAD

SURVISTA

Igl CB Surses vo tuttegn ainten la 3. liga

Atgnamaintg vevigl do la fegn d'emda la gronda desillusium: Igl CB Lumnezia veva gudagnea la sia parteida, uscheia tg'igl CB Surses vess stuia restar ainten la quarta liga. Ma ossa - alla meisa verda - ò igl club tuttegn cuntanschia la sia gronda fegnameira da giuier puspe ainten la terza liga.

2

«Sursto da talas ranfatschas»

L'emda passada ò chesta gasetta rapporto da ramproschas anvers igl magnagestium digl Parc Ela, Dieter Müller. I geva surtot per tensiuns cuagl persunal, las qualas on mano a tshintg disdetgas. Ossa ò la FMR discurrea cun Paolo Giacometti, igl president digl Parc Ela.

4

Dattigl en nov Elvis an Surmeir?

Chest meis ò la novitad dalla mort digl bov Elvis procuro per lengias grassas. Ossa ò la redacziun pero catto igl nov Elvis.

11

«M'angascher pigl surmiran»

Da curt è Simona Demarmels neida eligeida scu co-presidenta dall'Uniun Rumantscha Grischun Central. Tge vot ella?

3

ORD CUSCHINA

Be dai!

Preziadas e lecturas e preziads lecturs da la Pagina da Surmeir, Vus tegna in maun la 25avla ediziun da questa gasetta realisada da la FMR. E nus da la redacziun avain anc adina grond plaschair vi da quella lavur. En questas ediziuns avain nus instradà ina u l'otra midada: Nus avain introduci quest onn en la gasetta tranter auter las columnas, il tip ed il verset. E nus empruvrain da dar a livel grafic spazi ed aria ad in u l'auter element (fotografias, citats etc.). Gugent prendain nus però encunter Voss re-suns: redacziun@fmr.ch.

Il mais passà aveva la FMR scrit ora ina piazza redacziunala per il Grischun Central, tranter auter era cun inserar en questa gasetta. Il resultat è fitg modest – ils candidats e las candidatas na stattan betg en colonna davant noss biro! E quai ans para curius. Perquai ch'i fiss ina piazza attractiva en la regiun, en il champ medial fitg interessant al mument, cun cundiziuns da lavur attractivas, cun bler contact cun la gliued en la regiun. Perquai er sin questa via anc ina giada l'appel: Aves-sas Ti interess da lavurar en la regiun e surtut da rapportar or da quella? Has Ti meraviglias per da tutta sorts tematicas da la regiun, da sport, cultura enfin politica? Has ti in interess per il mintgadi ed il linguatg rumantsch? Lura be dai – T'an-nuzia! Nus avessan grond plaschair.

Corrigenda

L'emna passada ha la Pagina da Surmeir rapportà da las tensiuns en ed enturn il Parc Ela, tranter auter en connex cun la demissiun da tschintg collavuraturas e collavuraturats durant questa primavaira. In aspect che la FMR ha tematisà è la desditga da la cooperaziun tranter l'organisasiun turistica da la regiun (TSBA) ed il Parc Ela. Ed en quel connex ans è capità in sbagl: Nus avain scrit che quella cooperaziun custia a la TSBA 700 000 francs per onn. Quai è sbaglià – l'import correct è mo 75 000 francs. Nus ans per-gisain per quella svista.

paginadasurmeir.ch

La redacziun da la FMR vegn contactada qua u là tar dumondas d'abunents u dad inserats. L'administraziun da quellas duas chaussas succeda però sur l'editura da la gasetta, l'Uniun Rumantscha da Surmeir (URS). Per facilitar ils contacts ha la URS ussa installà ina nova pagina d'internet: paginadasurmeir.ch. Là èn da chattar tut las infurmaziuns necessarias davart la Pagina da Surmeir.

Per la redacziun FMR,
David Truttmann, schefredactor

BALLAPE

CB Surses: Igl Sursets cuntanschan nunspitgeidamaintg la 3. liga

Surpresa pigl CB Surses

Pia Plaz/FMR

En siemi davainta realitad. L'emprema equipa digl CB Surses gioia da nov ainten la 3. liga. Graztga a midadas ainten las ligas superiouras davainta liber en plaz pigls Sursets. Cun chella novitad nign tgi ò chinto.

Igl president digl CB Surses, Ivan Brenn ò prest betg pudia creir agls sies igls. Glindesde seira ratscheva el l'infurmaziun dall'Associaziun da ballape Svizra orientala tgi l'emprema squadra digl CB Surses avansescha ainten la terza liga. Ena sorpresa nunspitgeida ma miritada, conferma Ivan Brenn la novitad anvers la FMR. El sez veva anfignen glindesde passo nigna cunaschientscha da chellas midadas. Fatg è però tg'igls dus miglers sagonds plazzos ainten la quarta liga avanzan per la proxima staschung ainten la terza liga. Tranter chels er igl CB Surses I.

Spitgia 40 onns

Chegl è l'emprema geda ainfer igls passa curanta onns d'existenza digl club, tg'igls Sursets cuntanschan chel scalem. Anc da curt era Ivan Brenn digl meini, tgi seia migler da restar ainten la quarta liga alla testa dalla rangaziun tgi da cumbatter ainten la terza liga cunter la descensium. Ma scu dei igl proverbi «ad en tgalval regalo ins na varda betg ainten bucca». Ed uscheia sa legra igl president ansemen cun l'antiera equipa davart chella nova rangaziun. Pigls giueders monta la terza liga dantant duple trenamaint. Uscheia ins vign a vuseir igls giueders dus gedas l'emda sen la piazza da ballape ed avant gis impurtants perfign treis gedas.

Lubia da sa simgier

Chest'emda è sa musso tgi siemis pon davantar realitad. Tgi digl CB Surses vess anc chinto cun la terza liga? Nign! E tgi vess panso tgi l'equipa naziunala svizra cuntanscha igl quart final digl campiunadi europeic? Nign!



Foto MAD